

## PUGH, LEWIS HENRY OWAIN (1907-1981), milwr

**Enw:** Lewis Henry Owain Pugh  
**Dyddiad geni:** 1907  
**Dyddiad marw:** 1981  
**Priod:** Wanda Pugh (née Kendzior)  
**Rhiant:** Edith Mary Pugh (née Smith)  
**Rhiant:** Herbert Owain Pugh  
**Rhyw:** Gwryw  
**Galwedigaeth:** milwr  
**Maes gweithgaredd:** Milwrol  
**Awdur:** Brynley Francis Roberts

Ganwyd yr Uwchfrigadydd Lewis Pugh yng nghartref y teulu, Cymerau, Glandyfi, Ceredigion, 18 Mai, 1907, yn fab i'r Uwchgapten H. O. Pugh (1874-1954) a'i wraig Edith Mary (née Smith). Wedi derbyn ei addysg yng Ngholeg Wellington aeth i Academi Filwrol Frenhinol Woolwich a derbyn comisiwn gyda'r Magnelwyr Brenhinol (Royal Artillery) yn 1927. Wedi cyfnod yn yr Almaen symudwyd ef i'r India i gyflawni amrywiol swyddogaethau a throsglwyddwyd ef i Heddlu'r India yn 1936. Dychwelodd i'r fyddin yn 1940. Bu'n arwain brigadau Indiaidd a Gurkha gan wasanaethu ar y Ffin Ogleddol-orllewinol ac yn Burma yn ystod yr Ail Ryfel Byd ac ar ôl hynny yn y Dutch East Indies a gyda'r Gurkha ym Malaya. Enillodd Fedal Heddlu'r India yn 1940, anrhydedd prin i swyddog yn y fyddin.

Ei orchest pennaf a mwyaf enwog oedd cynllunio ac arwain cyrch yn 1941 yn erbyn pedair llong fasnach Almaenig ym mhorthladd Goa a oedd yn trosglwyddo gwybodaeth i longau tanforol yr Almaenwyr. Wedi codi'r rheolau cyfrinachedd, bu hyn yn destun llyfr gan James Leasor, *Boarding Party* (1978) ac yn 1980 gwnaed ffilm, '*Sea Wolves*', am yr antur gyda Gregory Peck (yn chwarae rhan Pugh), David Niven a Roger Moore. Ailgyhoeddwyd llyfr Leasor dan y teitl *Sea Wolves* yn 1980. Yr oedd 1945-46 yn flwyddyn nodedig yn hanes Lewis Pugh pan enillodd dri DSO, dau am ei waith yn arwain blaengad y symudiad ymlaen yn Burma ac yna'r trydydd yn Java. Wedi cyfnod yn y Swyddfa Ryfel yn 1953 bu'n Bennaeth Staff y Brif Swyddfa Gorllewin Pell yn 1956-57 a Phrif Swyddog Cyffredinol y 53 Gatrawd Gwyr Traed Gymreig (Byddin Diriogaethol) 1958-61. Bu'n gyrrnol catrawd Gurkha'r Brenin Edward VII o 1956 hyd 1961 ac yn Gyrrnol Cynrychioliadol Brigâd y Gurkha. Blynyddoedd anodd ac argyfyngus oedd y rhain ac ymdrechodd Pugh yn ddiflino i warchod buddiannau'r milwyr Gurkha. Penodwyd ef yn CBE yn 1952 a CB yn 1957.

Ymddeolodd o'r fyddin yn 1961. Ar ôl ymddeol bu Lewis Pugh yn Uchel Siryf sir Aberteifi yn 1964 a Dirpwy Lefftenant o 1961 hyd 1972. Gwasanaethodd hefyd yn gadeirydd Cymdeithas Geidwadol y sir ac yn y cyfnod hwn rhoes gynnig ar ddysgu Cymraeg. Ymhlith nifer o benodiadau cyhoeddus eraill, bu'n Ysgrifennydd Cyffredinol Cyngor Gwarchod Cymru Wledig, yn aelod o lysoedd y Llyfrgell Genedlaethol a'r Amgueddfa Genedlaethol, ac yn Ustus Heddwch. Dyn dymunol, o natur dawel ydoedd, gyda synnwyr hiwmor da.

Yn 1978 symudodd y teulu o Gymerau i Blas Wonastow, Wonastow, sir Fynwy. Priododd Wanda Kendzior (o Kington Langley, swydd Wilts) yn 1941 a bu iddynt ddwy ferch. Bu farw Lewis Pugh, yn 73 oed 10 Mawrth 1981. Bu'r angladd yn eglwys St Thomas, Overmonnow, Trefynwy 16 Mawrth a'i ddilyn gan amlosgiad.

### Awdur

Dr Brynley Francis Roberts

### Ffynonellau

*Who was who?*, 1981-90

*The Times*, 17 Mawrth 1981

*The Daily Telegraph*, 17 Mawrth 1981

*The Cambrian News and Merionethshire Standard*, 20 Mawrth 1981

*Western Mail*, 15 Mawrth 1981

*Adroddiad Blynyddol Llyfrgell Genedlaethol Cymru*, 1962

### Dolenni Ychwanegol

Wikidata: [Q12794838](https://www.wikidata.org/wiki/Q12794838)

Dyddiad cyhoeddi: 2012-10-22

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

